

12

D. D.
DISSERTATIO JURIDICA
DE
DELICTIS
CIRCA
DEPOSITUM.

QUAM
ADNUENTE CONSULTISSIMA FACULTATE JURIDI-
CA IN REGIA ACADEMIA ABOËNSI

PRÆSIDE

MATTHIA CALONIO,

JURIS PROF. REG. ET ORD.

Publico examini submittit

GABRIEL FRIDRIC KRAFTMAN,

Borgoæ - Nylandus

In AUDIT. MAJORI die XVII. Decemb. MDCCLXXXIII.

H. A. M. S.

ABOÆ,

Impressum apud Viduam Reg. Acad. Typ. J. C. FRENCKELL;

אָמַר לְפָנֵי יְהוָה

בְּשִׁירָה וְבְשִׁירָה

§. L

Qui — de legibus in civitate quacunque emendandis paullo curiosius disputant in duo delabi solent extrema. Alii, nimio antiquae consuetudinis amore occœcati, *super omnibus negotiis melius atque rectius olim provisum*, & quæ convertantur in deteriorius mutari (*a*) clamitant. Alii contra vetera damnant omnia, quasi sui ævi homines soli essent sapientes. Illos perniciosum; hos multo perniciosissimum publicæ rei errorem errare dixeris. Utut enim ferenda non sit eorum morositas, qui retinendas urgent leges, quas aut usus manifestissime coarguit, aut status aliquis reipublicæ inutiles fecit: longe tamen minus tolerari debent, qui novandarum rerum cœstro perciti nihil unquam in pristino statu permanere sinnunt. Neque ad ejus rei veritatem evincendam alio opus fuerit argumento, quam quod, experientia teste, quæ non optimis quidem, sed tamen immotis gubernatæ fuerunt legibus civitates, beatiores omni ævo exstiterint illis, quæ bonis quidem, sed mobilibus usæ sunt & inconstantibus. *Jus nostrum commune* quod A adtinet,

(*a*) *TACITUS Annal. L. XIV. 43.*

adtinet,' non equidem nos ea fascinati sumus superstitione, ut illud ultra omnem positum esse correctionem existimaremus. Non scilicet ignoramus & haud pauca in eodem utiliter subinde & salubriter esse mutata; & per ipsam legum civilium naturam fieri non posse, quin in eundem cum cæteris rebus humanis torqueantur orbem. At quidquid sit, dissimulare non convenierit, eam nobis jam dudum sedere opinionem, hodiernum *Legum nostrarum Codicem*, ut multorum annorum, sic multæ sapientiæ, esse opus; & quæcunque a Philosophis & JureConsultis de honesto & justo, de regendis populorum moribus, & privatorum iuribus per legitima judicia in tutum adserendis, tradita sunt, in unum hoc volumen, non confuse congesta, proditaque temere, sed ratione atque via, excussis nugis, esse translata, eoque inter se nexus disposita, ut necesse fere sit, una lege sublata cæteras plerasque infirmari. Quo autem magis de his suis virtutibus, de æquitate sua, cohærentia & concinnitate sumus persuasi; eo quasi difficiliores nos redditos persentiscimus ad habendam promiscue fidem frequentibus, quæ de suis nævis in publicum seruntur, querelis. Accidit enim jam, ut si de præceptis suis quæras, ea tanquam injusta, varia, & sui dissimilia traducant plurimi: si de poenis, sceleribus propositis, ut eas mox leniores mox graviores quam fas esset dictatas criminentur: si de judiciorum forma & in foro procedendi modo, ut hunc in primis accusent, tanquam futilibus alliga-

* * 3 *

alligatum tricis, ad protelandas tantum lites sinistra diligentia excogitatis. Non quidem unius ejusdemque momenti omnes has esse quiritationes unusquisque facile intelligit. Est scilicet evidens, alios solius propriæ utilitatis cupidine actos, ut prædandi materiem sibi patesciant; alios novandis quam gerendis rebus aptiores, ut de incondito suo penu aliquid etiam ipsis in medium promere liceat, optimas, sed incommosas sibi, sed incongruas suis opinionibus, leges, vituperare: alios porro, quod *incivile CELSO* vi sum est (a), non perspecta tota lege, de una vel altera ejus particula, inconsulta quadam temeritate, judicare. At quemadmodum his cum omnibus perliberaliter ageretur, si quis seriae responfionis honorem illis habendum putaret; ita diffitendum non est esse & alios, toto ab his cœlo diversos, qui & solida legum scientia instructi, & purissimo patriæ inserviendi studio inflammati, non sine probabili veritatis specie, dormitasse interdum bonum cætera Legumlatorem modeste arguunt. Atque horum in numerum, praeter non paucos alios, eos retuleris, qui id egerunt, ut quæ Jure nostro, de poena perfidiæ, in rebus alienis custodiæ alicujus creditis admissæ, fancita leguntur, parum sibi constare, ideoque corrigenda esse ostenderent. Impugnant hi ipsa legum nostrarum principia, & principia quidem, quorum latissime per omnem criminalem jurisprudentiam patet usus. Quo

(a) l. 24. ff. de Legg. & Senatus C.

autem magis eorum æquitatem, sicuti fieri id poterit, vindicari interest; eo minus quemquam succensurum nobis confidimus, quod specimen edituri Academicum, hanc potissimum, quæ de delictis est circa deposita, materiam, in qua discutienda tenues nostras experiremur vires, elegerimus. Suppeditabit namque illa nobis occasionem, Juris patrii in hoc arguimento philosophiam sic explicandi, ut quid de mota super ea re controversia statuendum sit, nemini manere possit obscurum.

§. II.

Depositum duplici, ut in communi sermone, sic in Jure, dicitur sensu. Aut enim speciem notat mandati, quo quis rem suam mobilem, alteri acceptanti, custodiendam tradit, ea lege, ut sibi legitime represententi, in eodem corpore restituatur: aut rem ipsam significat, a *Deponente depositario* in custodiam traditam, nobis, *Inlagsfå, nedfatt och förtrödt gods, Gads som är fatt under annars vård* (a). Varias a Jure Consultis hujus contractus proditas esse distinctiones, norunt omnes. Nos non alias adferemus, quam quas separatim nosse, ad pleniorum eorum quæ infra dicenda veniunt intelligentiam, maxime fuerit necessarium, remotis tamen prius, quæ constitui quidem vulgo solent,

(a) c. XII. HB. in rabr. & §. §. 2. 4. 5. 7. 8. cfr.
§. §. 3. II. ibd.

*) 5 (* *

lent, at sub eo, quam tradidimus, definitione comprehendi nequeunt depositorum speciebus. Sic quia depositum alienam supponit custodiam, venire hoc nomine non possunt illæ *Sequestri* species, quibus res litigiosa, pendente lite, ipsimet suo possessori, vel concessa, vel non concessa eidem rei usu, custodienda imperatur (a). Pari modo notissimos depositi terminos egreditur *depositum*, quod dici suavit, *irregularē*, quando rei fungibilis certa quantitas ad numerum tantum pondus & mensuram deponitur, ea videlicet cum conditione, ut tantundem non idem restituatur. Hic enim contractus, quam & voce *Inlagsfå* in Jure nostro non contineri, tam certum est, quam quod certissimum, in *mutuum gratuitum* ordinarie incidit. Idem valet de pecunia alienæ administrationi concedita (b); ut & de illa, quam quis quæstus suo nomine faciendi causa, alteri mandavit (c). Licet tamen negari non debeat omnem pecuniam, qualisunque mandati lege alienæ fidei commissam, hanc securum ac *Commodatum & Mutuum*, quatenus vel custodiæ præstandæ, vel sive speciei sive quantitatis restituendæ necessitatem involvunt, depositi naturam in tantum imitari. His observatis, quod supra definitum fuit *depositum*

A 3

depositum

(a) Utriusque speciei exempla occurunt c. VIII. *UtsB.* prioris quæ *Sequestrum de non abalienando* appellari soleat. §. 8. in fin. posterioris §. §. 1. 3. 8. & XVIII. 3. *ÅB.*

(b) XXII. 1. 4. *ÅB.* XLV. 2. *MB.* I. 8. *UtsB.*

(c) XVIII. 1. 3. 6. *HB.*

situm proprium seu *regulare* sic jam dispescimus, ut aliud sit *Depositum in specie tale*, quando nimurum res vel non litigiosa, vel litigiosa quidem, sed simpliciter ab uno litigantium deponitur (*a*): aliud *Sequestrum* strictius sic dictum, cum res litigiosa vel mutuo partium consensu, vel, quod frequentius contingit, ex Judicis aut Executoris decreto, tertio alicui, sive *longa*, sive *brevi*, quod ajunt, *manu*, custodienda traditur, ea lege, ut finita lite victori reddatur (*b*). Utrumque horum in duas iterum velut species abit, prout Depositarius vel *publica* (*c*) vel sola *privata* fide (*d*), ad rei custodiam fuerit obligatus. *Depositum* porro in specie tale, quod privatæ depositarii custodiæ mandatur, vel *voluntarium* est, cum deponens ex libera sua voluntate depositarium sibi eligit (*e*); vel *necessarium* seu *miserabile*, quod erepta deponenti, per imminens grave periculum, incendii e. g. naufragii, hostilis invasionis &c. depositarii eligendi facultate, ipso ut plurimum factò contrahitur (*f*). De his au-

tem

(*a*) XII. 1. 2. 3. HB. XXVI. 1. 2. XXX. 1. RB.

(*b*) XVIII. 3. ÅB. XII. 11. HB. VIII. 7. UtsB. K. Regl. om upbördens säkra förvaltn. d. 13. Novemb. 1739. §. 10.

(*c*) V. 1. JB. XXVI. 1. RB. K. Förordn. d. 22. Novemb. 1749.

(*d*) XII. cap. HB. integr.

(*e*) Exempla hujus depositi in antecedentibus adfam occurunt.

(*f*) XII. 10. HB.

* * * * *

tem singulis prolixius commentarii ad nostrum jam non institutum pertinet. Id unum addere licebit, depositum voluntarium, quale modo descripsimus, in re fungibili contractum regulariter non praesumi, nisi res sacculo, sarcinulae, involuero, arcæ, cistæ &c. sub signaculo, sera & clavi fuerit inclusa. Quoties enim hoc non obtinuerit, quantitas tantum deposita, & usus speciei depositario concessas censetur. **Quod** tamen in deposito miserabili secus se habere per se patet.

§. III.

Consequitur autem ex ea, quam tradidimus, depositi proprie sic dicti definitione, nec proprietatem, nec usum rei depositæ, hoc contractu in depositarium transferri, sed id solummodo agi, ut hic ad rem pari, qua suammet diligentia custodiendam, & ubicunque deponenti reposcere eam libuerit, nec lex aut ratio impedimento sit, in specie restituendam, reddatur obligatus. Quæ ergo in deposito committi acciderit delicta, ad quatuor velut classes referri commode possunt. Delinquitur enim vel in proprietate rei, depositum aut insiciando, aut contrectando; vel in usu rei, re, domino invito, vel utendo, vel eandem aliis utendum concedendo; vel in rei custodia, dolo vel culpa id efficiendo ut res aut pereat aut deterioretur: vel denique in ipsa restituzione rei, hanc nimirum, praeter libatum deponentis, injuste differendo. Quando autem

delit-

delicti voce jam utimur, etiam nobis non monenti-
bus facile cuivis est perspectu, in generalissima sua
acceptione eam a nobis adhiberi, ut non modo *crimi-
na* proprie sic dicta, quæ poenam habent comitem,
verum & quæ *civilia* alias JureConsultis adpellari so-
lent *delicta*, & damni solum dati reparazione, addita
leviori interdum *mulcta*, vindicantur, suo ambitu com-
plectatur.

§. IV.

Ante vero quam ad principia, quibus Juris no-
stri, de violata depositorum fide, sanctiones innitun-
tur, specialius enodanda progredimur, e re nostra es-
se videtur, & de moralitate, quam vocant, criminum
huc spectantium generatim nonnulla præmittere, &
quæ de iis gentium fuerint opiniones obiter comme-
morare. Sciendum itaque est, ipso jure naturali gra-
ve omnino esse scelus datam fallere fidem; idem vero
multo existimandum esse gravius, cum fallendi occa-
siones sub ficta captantur amicitiae specie. *Turpis vi-
delicet culpa est*, ut eleganter CICERO, quæ duas res
sandissimas violat, amicitiam & fidem. *Nam neque man-
dat quisquam fere nisi amico, neque credit, nisi ei, quem
fidelem putat*. *Perditissimi igitur est hominis, simul &*
*amicitiam dissolvere, & fallere eum, qui lœsus non esset
nisi credidisset* (a). Et sane, qui amicorum lædit fi-
dem,

(a) *Orat. pro Rose. Amer.* c. 39. cfr. PUFENDORFF
Zus. N. & G. L. V. c. 4. §. 7.

dem, quam propriæ suæ operæ vicariam pactis suis
constituere sibi solent homines, is commune oppu-
gnat omnium præsidium, & quantum in ipso, distur-
bat vitæ societatem. Hinc neque mirum, quod per-
fide circa deposita versari, grande in primis apud o-
mnes, quoad constat, gentes, etiam illas, quibus la-
trocinia honesta visa sunt, habitum sit nefas. *Ebræo-*
rum olim moribus, depositum, ἀστερεῖς ισεγὸν καὶ λεῖον χει-
μα, tanquam res sacra & divina, custodiendum præci-
piebatur (a). *Græci* pariter ac *Romani*, prisco ævo,
cum nondum didicissent, quas haberet aliena pecunia
veneres, non minus turpe judicabant *Sacrum* abnega-
re depositum (b), quam perjurium committere. Erat
etiam illis persuasum, superstitiose quidem, sed utili-
ter in publicum, iis qui alterutrum horum fecissent,
aut alias falsi quid admississent, tubercula in naso vel
lingua, vel alia hujusmodi cutis vitia in aliqua cor-
poris parte exoritura (c); capillos defluxuros (d); &
dentes nigra obductum iri robigine (e): his scilicet
corporis deformitatibus, & cæcitate præterea, & ne-
scio quibus non chronicis morbis, DEos eorum im-
probitatem, vel tanquam totidem stigmatibus, ne la-

B

tere

(a) *FL. JOSEPH.* *Antiqq. Jud.* L. IV. c. 8. 38. cfr.
2. *Maccab.* c. 3. integr.

(b) *JUVENAL.* *Satyr.* XIII. 15-16.

(c) Vid. *CASAUBON.* in *Lect. Theorit.* c. X. p. 85.

(d) *OVID.* *Amor.* III. 3. 5.

(e) *HORAT.* *Carm.* II. 8. v. 1-5.

* * 10 * *

tere posset, notatuos, vel ulturos fore (a). Quid? quod & solius cogitationis de occultando deposito pœnas, non ab eo tantum, qui ipsemet delinquisset, sed & ab universa ejus domo & familia, radicitus quippe exstirpanda, DÆos repetituros crederent (b). Veteres Germani, ut nullos mortalium armis aut fide ante se esse (c) gloriabantur; ita & pacti cujuscunque, multo magis depositi religionem violare flagitiolum adeo ducebant, ut cum perpetuo dedecore hujusmodi perfidiam conjunctam putarent (d). In eadem fere sententia & cæteras saltim cultiores plerasque fuisse gentes, longum magis, quam operosum foret ostendere. Et quidni essent? Una enim alte sonantis naturæ vox omnes

(a) Hinc fraudatorem quandam in hæc verba loquenter inducit JUVENAL. *I. c. v. 92-96.*

*Decernet, quodcunque volet, de corpore nostro
Iſis, & irato feriet mea lumina ſiſtro,
Dummodo vel cæcus teneam quos abnega nummos.
Et pthifis, & vomicæ putres, & dimidium crus,
Sunt tanti?*

(b) Notabilis in hanc rem historia, Glauci Spartani, de quo & JUVENAL. *I. c. v. 199. seqq.* legitur apud HERODOT. *Lib. VI. c. 87.* cfr. GUNDLINGII disquisitio, *Warum die Römer die ablæugnung des depositi so ſcharff beſtrafft?* quæ octava exstat in Gundlingianis *P. II. p. 179. seqq.*

(c) TACIT. *Annal. L. XIII. c. 54.*

(d) HEINECC. *ELEM. JURIS GERMAN. Lib. II. Tit. XII. §. 331.*

* * * * *

omnes docuit, *quanti essent illa verba*: **UTI NE PRO-
PTER TE FIDEMVE TUAM CAPTUS FRAUDATUSVE
SIEM? quam illa aurea!** *UT INTER BONOS BENE A-
GIER OPORTET ET SINE FRAUDATIONE (a)?*

§. V.

Ex capite autem perfidiæ in primis detestabilem & esse, & gentibus viñum fuisse, colum in rebus depositis admissum, ex hactenus adlatis adparet. An vero dolosos depositarios in furum numerum retulerint, & an qui depositum intervertit *furtum* re vera fecisse dicendus sit, alia est quæstio, & ea quidem hoc loco non prætereunda. Ex Romani Juris philosophia *furtum* erat qualiscunque *contrectatio fraudulosa lucrificiendi caussa*, *vel ipsius rei*, *vel etiam usus ejus, possessionis* (b). Consequebatur inde, ut non quidem *furtum* patrasse putaretur, qui rem alienam suæ fidei quoquo modo commissam fuisset *inficiatus*, quippe quod *furtum* sine *contrectatione* intelligi non posset (c): sed ut tamen & is, qui depositum intercipiendo caussa se posuisset (d); & qui re commodata, ultra præstitutum tempus, domino invito, usus es-

B 2

set

(a) CICERO de Offic. L. III. c. 17.

(b) §. 1. Inst. de oblig. quæ ex delict. nasc.

(c) l. 1. §. 2. & l. 67. ff. in pr. de Furtis.

(d) l. 1. §. 2. loc. cit. & l. 3. Cod. Depositū vel contra: item §. 6. Inst. l. c.

set (a); & colonus, qui post lustrum conductionis, anno amplius, præter domini voluntatem, e conducedo prædio fructus perceperiset (b); imo & dominus ipse qui suam rem, in qua usus fructus alteri erat constitutus, surripuisset (c); ut alias his cognatas perfidiae species taceamus, famosa tenerentur furti actione (c). Saltim hujus tenoris vulgaris erat doctrina, quæ non tam rerum ipsarum argumentis, quam legum apicibus inhærebat. Interim non deerant, quibus a communi loquendi usu & recepta unanimibus velut hominum suffragiis furti idea, qua res ex aliena ablata supponitur custodia, justo longius recessisse videretur, allegata modo hujus criminis definitio. Quamvis enim negare non possent, furtum inter & violatam in rebus alienis fidem nonnullam, mox propriam, mox longinquorem esse adsinitatem; cum tamen aliam non minorem inter duo hæc criminum genera observarent discrepantiam, incongruum judicabant, quæ diversissima essent, arbitraria nominis impositione, in unum compingi. Certe TRYPHONIUS respondit contra Tutorem ex distractis bonis pupilli furti actionem non esse; Eum enim propter admittam administrationem non tam invito domino contredicere videri, quam perfide agere (d): Responsum etiam

(a) I. 40. ff. de furt.

(b) I. 67. ibd.

(c) I. 15. §. 1. ibd.

(d) I. 55. §. 1. ff. de Administr. & peric. Tutor.

iam est a PAPINIANO, procuratorem qui traditas si-
bi res non reddidit, judicio mandati, non furti, teneri
(a). Quae an cum priori ista de furto doctrina satis
in consensum redigi queant nos equidem valde dubi-
tamus. Sed his immorari jam non vacat. Id cer-
tum, omnium pæne, quæ Europam incolunt popu-
lorum legibus jam explosam esse laxiorem illam, quam
Jura Romana adoptaverant furti definitionem. Ger-
manis ab omni ævo folleenne fuit, ut non aliud crimen,
quam quo quis rem domino invito & ab ejus custo-
dia clam surripuisse, furtum adpellarent, hocque a
fraude quaenque, qua quis rem alienam suæ fidei
concréditam intervertisset, adecurate ut pluriuum dis-
cernerent. Adparent jam in antiquissimis eorum Le-
gibus, quantumvis Jure Romano multifariam inter-
polatis, haud obscura ejus rei vestigia (b); At luculen-
tissime eandem evincunt, quæ domesticas preffe magis
consuetudines sequuntur medii ævi Jura. Sic
Speculum Saxonum furti crimen ei objiciendum vetat,
qui re commodata, ultra quam conventum erat, usus
esset, addita ratione, *wenn ers im selber like*, quod do-
minus ipsem et rem illi commodaasset (c). Eum quo-

B 3

que,

(a) I. 55. ff. *Mandati vel contra.*(b) Vide sis Leg. *Salic.* Tit. LIV. de re praefata. Leg.
Rip. Tit. LII. Leg. *Alam.* T. LXXXVII. Leg. *Baiwari.*
Tit. XIV. apud *GEORGISCH* in Corp. *Juris Antiqu.* pp.
110. 166. 234. 306. 307. Capit. Lib. VI. c. 30. ibd. p. 1517.

(c) Lib. III. Art. 22.

que, qui rem alienam inundatione aut vi fluminis in suas manus delatam abnegasset a furti actione liberat, quia eam nec clam, nec aperta vi e domini custodia abstulit, *wenn ers nie dieplichen noch räuplichen aus yennes gewehren bracht* (a). Similiter *Speculum Sueicum* diserte cavet, ne eum, qui commodatum aut depositum distraxisset, furti aut rapinæ reum quisquam ageret, *man mag ihm weder diebstahl oder raubs daran gezeigen* (b). Servat eandem furti notionem *Constit. crimin. Carolina* (c); ut & *Anglorum* (d) ac *Danorum* (e) Jura. Nec patriis nostris legibus aliud unquam placuit, quam ut *furari* idem esset ac *rem auferre ex aliena custodia*. Ostendunt id vel sexcenta & antiquiorum & hodiernarum legum loca, quippe quæ vocabulum *ftjåla* per *taga* explicant, & constanter supponunt

(a) *Lib. II. Art. 29.*

(b) *Artic. 250.* ex edit. GOLDASTI. cfr. KRESSIUS *ad Constit. crimin. Carol.* p. 614. seqq. & THOMASIUS in *Dissert. trigam casuum ex regulis Jurispr. examinatorum complexa*, quæ exstat in *collectione UHLiana T. I.* p. 890. seqq. *Cas. I. §. 3.*

(c) *Art. 170.*

(d) Hinc BLACKSTONE *Comment. on the Laws of England, Vol. IV. c. 17.* p. 229. 230. *Simple Larceny or Theft is the felonious taking and carrying away of the personal goods of another. -- It must be taking. This implies the consent of the owner to be wanting. Therefore no delivery of the goods from the owner to the offender, upon trust, can ground a larceny. &c.*

(e) *K. Christian V. Danske Lov, Lib. VI. c. 17.*

nunt rem a fure clam fuisse surreptam inque suammet custodiam vel jam transflatam vel transferendam (a). Non igitur nos movet LOCcenII auctoritas, qui depositi abnegationem furti speciem esse contendit (b). Hæc enim sua interpretatio non patrii, sed Romani juris, ex familiari illius sæculi vitio, principiis innitur, nec ullum, ne minimum quidem in excitatis a se legum nostrarum locis invenit præsidium. Objiceret forte aliquis, dolosum tamen depositarium certis in casibus ordinaria furti poena, imo & majori, plebendum juberi. Sed, ut non jam dicam in nostro Jure, positis iisdem utrinque caussæ momentis, nunquam eandem furibus & perfidis depositariis poenam esse statutam, ceu id ex infra adducendis ad oculum patebit; manifestissima absurditate laborat illa argumentandi ratio, delictum A. punitur ut delictum B. ergo delicta A. & B. sunt eadem. Si quid ex fancita per expressum ista poenarum paritate sequeretur, hoc procul dubio id esset, delicta illa per suammet quidem naturam a se invicem esse diversa, legali autem aestimatione parem censeri utriusque atrocitatem. Saltem non video, quomodo quis ex formula Juris nostri, *straffes som för tjusnad* (c), cui synonymum plenum.

(a) I. Fl. TbB. WGL. in pr. I. II. capp. TB. LL. XL. 6. XLII. 4. MGB. cfr. EHRENSTRÄLE *Jurispr. crim.* p. 335. § 3.

(b) *Synops. Jur.* p. 369.

(c) Vid. VIII. 2. XII. 10. HBI.

rumque est illud, stånde tjusrått, alium elicit sen-
sum.

§. VI.

Sed fac jam perfidiam in re deposita furtum non esse. Fortassis tamen gubernatricis justitiae regulis conveniret, eandem, propter summam sui turpitudinem, & proximam cum furto cognitionem, pari ac hoc ipsum poena vindicari? Ita sentiunt nonnulli: ut proinde operæ pretium sit paucis ea de re dispicere. Ut vero recte formetur status controversiae, necesse est observemus, non id jam quæri, annon existere possint species violatae in deposito fidei, in quibus poena ad ordinariam furti, imo ultra eam exasperari & possit & debeat? Id scilicet solum quæritur, an in genere, & positis iis, in quibus ambo hæc crimina per suam naturam convenire possunt, circumstantiis, utrinque iisdem, æquum etiam sit, eandem esse utriusque poenam. Prius vero quam hanc quæstionem discutiendam adgredimur, concedendum nobis postulamus, non ipsam delinquentis malitiam, aut internam velut actionis pravitatem, eam esse decempedam qua poenarum magnitudinem Leges civiles metiantur. Quæ publicæ securitati ex uno quoque criminе men-
tuenda sunt damna, veram & genuinam exhibit men-
suram, ad quam sapiens Legumlator earum exigit
quantitatatem. Punit is non quia peccatum est, sed ne
peccetur; adeoque parum omnino curat, an qui de-
liquit,

liquit, tantis adficiatur malis, quantas forte sua meruisset malitia, cuius neque gradus, ulla humana arte, ad numeros & calculum revocari possunt. Sufficit ei, ut in poena ad exemplum satis sit, id est, ut ejus metu cæteri ab audendis similibus delictis, saltim in tantum deterreantur, ut committi saluti & tranquillitati exstantius nullum, ab illa parte, periculum magnopere sit extimescendum. Meminit etiam, non tam duras & contumeliosas poenas, quam potius severitatem nullis expugnandam precibus vel minis, & promptitudinem in iis quæ semel sanctæ sunt, multo quamvis mitioribus, irrogandis, illud esse remedium, quod leges a contemtu vindicat, certissimumque illis obsequium parit (a). His autem veritatibus præstru-

C

ctis,

(a) Adposite ad hanc rem MICHAELIS Mosaisch. Recht. P. VI p. 10. seqq. Die Gröſſe der Strafen muß nach ihrem Endzweck bestimmt werden: So groß, als nötig ist, um diesen Endzweck zu erreichen, aber auch so klein, als es die Absicht der Strafen zuläßt. - Der Zweck der Strafen kan wohl nicht seyn, daß dem Schuldigen so wehe geschehe oder so viel uebel angethan werde, als seiner bößartigkeit oder bößen handlungen proportionirt ist. Die Sache kann geschehen, man kann es auch, noch will ich kein Wort dagegen sagen, als eine Definition der Strafen annehmen, aber wenigstens der Zweck der Strafen ist es nicht. Dis blosse Uebel, ohne einen weiteren Zweck, der es rechtfertigte, wozu sollte es helfen? Er, der Delinquent ist böse, dis ist ein Uebel; er thut viel böses, und beleidigt andere, dis ist noch ein Uebel mehr. Aber warum sollte ich ohne weitere Ursache das dritte uebel dazu thun, schmertz und Strafe für ihn, wenn

Etis, ut nullo negotio perspicitur, eo omnem redire disputationem, utrum a dolosis depositariis, an furibus plus in civitate noxae & perturbationis sit metuendum: ita simul intelligitur, ex instituta justa inter hos ipsos comparatione totam pendere hujus controversiae decisionem. Depositarium igitur primum consideremus. Hunc sibi, regulariter, eligit ipse Deponens, & non eum quidem quem fors obtulerit, sed aut amicum longa consuetudine probatissimum, aut quem cæterum singularis vitæ ante actæ integritas, incorrupta fides, ac amplior patrimonii facultas, ex communi bonorum virorum opinione, quæ rarissime fallit, æstimata, sibi eligendum commendaverint. Deponit deinde in ejus custodia dominus, quem stulte credulum & suæ securitatis incuriosum saltim leges præsumere non debent, rem suam, non clam & remotis arbitris, sed potius ex ipsius Legumlatoris confilio (a) vel præsentibus idoneis testibus, vel accepta super facta depositione depositarii syngrapha. Ubi & depositionem utcunque faciendam dira urserit necessitas, concipi vix potest adeo usque defuturos ejus rei

das weiter keinen nutzen schaffe, als daß nun statt zweyer uebel, noch ein ibnen beyden die wage baltendes uebel, also statt zwey, vier in der welt wären. - - - Die wesentliche zweck der strafen ist kein anderer, als der in Klaglibellen und Urteilen ausgedruckt zu werden pflegt: Andern zum Exempel. &c.

(a) XII, 1. HBl.

rei testes, ut in casu exortæ litis, omni plane probatio-
ne destitueretur deponens. Addi possent plura. Sed
& ex his satis patet, non multam, generatim loquen-
do, adesse metuendi caussam, fidem semel datam a De-
politario violatumiri: cariorem scilicet plerumque
huic suam futuram existimationem, quam ut tam tur-
pi flagitio ejus facere vellet jacturam: Non latendi
spem, vel impunitatis persuasionem, maximas alias
peccandi illecebras, audaciam tanti sceleris illi addi-
turas: Si & deliquerit, facile non eventurum, ut no-
tabile inde damnum sentiat Deponens, regressum quip-
pe ad ejus bona, pro sua indemnitate habiturus: Et
fieri tandem non posse, ut hoc iteretur crimen, cum
ei, qui semel perfidum semet præstítit, ulterior a ne-
mine habeatur fides. At de furibus jam videamus.
Quod ad hos, vix ac ne vix quidem ullum invenies
mortalium, tam profligatum, tam perditum, tam ab
omni, non modo honestate, sed etiam simulatione ho-
statis relictum, quam sunt ii qui ex furto quæstum
fecerunt. Non hos pudor, non religio, a scelere a-
vocat. Sacra æque ac profana rapacibus manibus
contrectant. Occultim divagantur: noctem & tene-
bras amant: inque furandi opportunitatibus investi-
gandis supra modum sagaces, oculatissimi etiam cu-
juscunque patrisfamilias follertia callide deludunt.
Elabendi innumeræ sibi parant rimæ: Et si vel pre-
hendi illis acciderit, nisi in flagranti crimine id fiat,
tantum abest, ut semper, vel ablata sibi, vel eorum

aestimationem, recuperare possit dominus, ut potius celatis aut distractis suis bonis, irreparabile saepius damnum ferre cogatur. Nec est quod dicas furem, ad rerum surreptarum pretia, operis resarcienda teneri (a). Non enim hoc semper obtinet; nec ulla tam mortua, quam haec est, in toto Jure exstat littera. Quis namque in ea gente, in qua servitus jam dudum, felicibus alias auspiciis, abolita est, furem in domo sua alendo, novis se ab ejus, aut complicum, protervia, periculis exponeret. Evicit præterea multiplex experientia inemendabilem esse furum pravitatem, & certari proinde quovis posse pignore, eum qui semel furatus est, prima quacunque, quæ se obtulerit, occasione, furtum patraturum. Haec fere præcipua sunt, quæ utrinque stant, caussæ hujus momenta. Quisquis eadem paullo diligentius secum perpenderit, facillime reperiet, quid ex sanioris Jurisprudentiae Legislatoriae regulis ad propositam quæstionem sit respondendum. Reperiet nimirum, in dolosos depositarios, quorum perfidia, & per se raro admodum, tantoque quidem rarius, quanto ipse depositi contractus infrequenter est, obvia, & præterea, ubi occurrerit, facillimo negotio detegenda, civitati formidolosa nunquam evadere potest, mitius consulendum esse; & fures contra, utpote professos dominiorum hostes, cæteris, ut supra jam monitum, paribus, durioribus poenis coercendos: nec posse sine summa iniestate, horum crimina

(a) XL. 4. MGB.

mina legibus civilibus, quæ non tam vitia ipsa, quam publicam utilitatem vindicant, eo tenus æqualia censi, ut in utraque eadem severitate animadvertis debet. Nuspianum fiet, ut quem fures, vel soli vel cæteratim vagantes, hominibus incutiunt periculorum terrorem, eundem & a depositariorum infidelitatibus experiantur: & illos tamen eadem ac hos in civitate conditione vivere patiemur? Non sane id feret, nec regnatrix justitia, quæ vult, ut ubi minor est privatorum, ibi major sit legis & provisio & custodia, nec ipsius æquitatis ratio, quæ nocentissima rei publicæ membra acerbius tractanda, cæterorum autem, cum minori communis pacis ac quietis damno peccantium, existimationi parcendum, inque hos proinde infamem in omnem vitam actionem, qualem in fures, temere concedendam non esse, aperiissime suadet. Notasse quoque juvabit, leges vigilantibus scribi non dormientibus, ferriique illas secundum ea, quæ ut plurimum sunt, non ut pœnas pœnis præter necessitatem accumulando, somnolentæ unius vel alterius seu stoliditati, seu ignavaviæ succurratur. Hinc si quis vel ignoti hominis, vel cogniti fraudatoris, vel helluonis alijcujus facultatibus lapsi fidem, sine syngrapha, sine testibus, sibi datam fecutus, jaætiram fecerit rerum a se depositarum, frustra omnino legum humanitatem accusabit. Habebit is, quod suæ tribuat imprudenter discatque cautius in posterum mercari.

§. VII.

Feriit etiam hoc tantum & tam evidens inter furtum & violatam depositi fidem discrimen adeo usque omnium, quotquot unquam exstiterunt, sapientiorum Legumlatorum oculos, ut quamvis & eorum nonnulli hanc pro illius quadam specie habendam decreverint, cæteri vero plerique, propter assumtum utrobique improbum ex alienis bonis lucrifaciendi animum, poenam hujus cum poena furti commetendam quodammodo voluerint; singuli nihilo minus minimam, cui, ex suis cujusque principiis, in furorum genere esset locus, huic perfidiae mulctam impoſuerint; paucioribus aliis aliam fere ejus vindicandæ viam ineuntibus. Jure Mosaico, cum furtum qualificatum quadrupla & interdum quintupla fueretur sui aestimatione, abnegati qualiscunque depositi dupla tantum erat mulcta, tam scilicet exigua, ut ne in furto quidem simplici, nisi exstante adhuc apud furem, ut in specie restitui posset, re furtiva, obtineret (a). Eadem dupli poena & Jure Attico huic criminis, & sic quidem paullo mitior, quam quæ furto minimo, ex quo

(a) EXOD. XXII. 9. cfr. MICHAELIS lib. cit. § 162: ubi aestimatum dicit hoc crimen einem diebstahl von der untersten art gleich. Vid. quoque ibid. §§ 244. 289. Quia autem ratione inductus GROTIUS ad Ius Justin. pp 53. § 4. quintuplam in gente Ebraea statuerit invaluisse abnegati depositi poenam equidem non intelligo.

quo reus præterea quinque dierum carcere plecti solebat, sicut constituta (a): Quam & hinc Romani in Leges XII. Tabularum transtulerant (b); licet tamen illam, utut in furorum genere levissimam inque furto non manifesto solum usitatam, qua depositarios mitigandam censeret Prætor, data nimirum ex deposito, nisi miserabile id fuisset, quo in casu veteri jure, standum foret, in simulum tantum actione (c). Quod idem & in noviori Jure Justiniano est retentum, ea solum cum mutatione, ut si quis & distraxisset res suæ custodiæ creditas, & cum hoc crimen inficiandi impudentiam conjunxit, ob crescentem perfidiæ culpam, in duplum ex isto facto teneretur (d). Simplis furti poenam dolosis depositariis irrogandam sanxit CAROLUS V. Imperator; quam tamen ex usu fori semper fere remissam, & arbitrariam aliam in ejus locum coercitionem, quæ infamiam non importaret, introductam, cum aliis bene multis docet KRES-SIUS

(a) MARCILIUS ad Legg. XII. Tabb. c. XVII. p. 70.
cf. POTTERS Griecb. Archæol. Lib. I. c. 24. p. 260.

(b) Legem ipsam his JAC. GOTHOFREDUS verbis ad imitationem vetustatis expressit: *Si quid endo deposito dolo malo factum escit duplione luto.* Cfr. GELLII Noft. Att. L. XI c. 18.

(c) I. 1. §. 1. ff. *Depos. vel contra*, ubi §. 4. ULPIANUS addit: *Hac autem separatio cauſarum iustum rationem habet, quippe cum quis fidem elegit, nec depositum redditur, contentus esse debet simulo.*

(d) §. 26. *Inſt. de Action.*

SIUS (a). In simplum, sub expensarum tamen ex iusta detentione, non mulctae, nomine, eos condemnant *Anglorum Jura* (b) in fures alias admodum severa. Vetus Jus *Islandicum* (c) & *Norvegicum* (d) quatuor; *Futicum* (e) autem, quocum & hodiernum *Danicum* (f) consentit, sex marcarum mulctam illis imponunt, inter Fiscum & Actorem ex aequo partendam. Atque id quidem singulare habent haec Jura, ut contra quam in aliis gentibus fere omnibus fieri suevit, nullam plane habeant quantitatis depositi rationem. Antiquiores nostratium *Leges Provinciales* (g), non minus quam *Jus Christophorianum* (h) & *Municipia-*

(a) *Constit. crim. Art. 170.* Solche missthat ist einem diebstahl gleich zu straffen: qua de formula videatur KRES-SIUS ad eundem locum p. 617. Ordinariam autem furti poenam in ditionibus Domus Austriacæ in usum denuo revocatam videre est ex *Constit. crim. THERESIANA Art. 94. §. 4. p. 257.*

(b) *BLACKSTONE l. c. Lib. III. c. 9 pp. 162. 163.*

(c) *Islandske Lov, Jøns Bog. Tyve Bl. c. XV, Versionis Danicæ Hafn. 1763. editæ p. 344. 345.*

(d) *Norrskæ Lov Lib. V. c. 8 Art. 4.*

(e) *Den rette Fydske LovBog Lib. II. c. 114.*

(f) *Lib. V. c. 8. §. § 3. 4.*

(g) Vid. *XVII. Fl. JB UpL coll cum VII Fl. KöpmB ibd. XVI. Fl. JB SudermL XI. Fl. KöpmB. WestmL XIII. Fl. 1. §. JB. HelJB. XI Fl. JB. WLG. c. XX. BygnBl. Dall Lib. XVI. s. 6. SkåneL.*

(h) *IX. Cap. KöpmB. LL.*

cipale (a) de ipso quidem deposito, & quid, ubi culpa vel casu perire idem accideret, circa ejus præstationem juris esset, summa cum æquitate disponunt: Intervensi vero depositi nullam plane mentionem faciunt, vel quod rarissima illius exstant exempla, vel quod præterire malling incredibile in gente promissorum tenacissima scelus, quam vindicando ostendere fieri illud posse (b). Unde nec evenire aliter potuit, quam ut in puniendis hujusmodi criminibus, si quando occurserent, instabilis admodum olim esset Judiciorum praxis (c). Sustulit hanc juris incertitudinem

D

nem

(a) *V. cap. KämpB. StL.*

(b) Facile dixeris rarissime olim usitatum depositi contrarium. Saltim leges celebriorum circum mare Balticum Empotorum diserte id innuant. In Codic. Jur. civil. Megapol. apud WESTPHAL in Monum. Cimbr. T. I. p. 253. exempli causa, dicitur: *Was bey jemandes zu getreuen Händen deponiret - - - Es ist aber dieser gebrauch allbie so garnicht gemein.* cfr. ibd. p. 2067. 2097. 2098. Sic neque Jus Wisbyense nostrum, nisi de custodia tantum depositi quidquam præcipit. vid. Lib. II. c. 30.

(c) *Theoreticos simplicis furti pœnam his in casibus convenientissimam judicasse, argumento sunt Doctorum ejus ævi scripta.* Vid. LOCCEŃ. I. c. KLOOTS Lagfar. Spec. p. 147. *Ejusd. Synops. ver. crim. p. 124.* EHRENSTRÅLE Jurispr. civ. p. 237. §. 21. nec dubium quin e Jure Romano hanc suam hauferint sententiam, cui sane nulla ratione adfistit ad quem alias, provocant locus *cap. 53. BygnB. LL.* Dissenisse tamen ab his videntur Pragmaticorum haud pauci, nixi, inepte licet & illi, *cap. XI.*

nem *Codex Fridericianus*, cuius de omni hoc argumento sanctiones adeo sua sapientia se commendant, ut reliquarum plerarumque gentium de hac causa legibus anteferendae omnino videantur. Ea quidem in re, cum cæteris plerisque convenit hoc Jus nostrum, quod interversionem depositi, licet non furtum, furto tamen analogum quodammodo crimen esse censeat, ejusque ideo poenam, ex pretio rei interversæ, quemadmodum fere in furtis solet, æstimandam jubeat. In definienda autem ipsa magnitudinis poenæ ad rei interceptæ valorem proportione, invictæ veritatis propositionem, quam ex ipso sociali, quod natura constituit jure in §. præced. demonstravimus, levius scilicet delinquere eum, qui in re suæ custodiæ mandata perfide se gesit, quam qui rem ex aliena surripuit custodia, fundamenti loco substernit. Quia vero in aliis depositis minus, in aliis majus est hujus perfidiæ periculum; eadem & in aliis simpliciter, in aliis violata simul ipsiusmet domini custodia exercetur: hinc & singula hæc momenta, ad calculum revocat, & ex illis, servata tamen constanter fundamentali ista, cuius modo meminimus regula, diversos, pro diversis casibus,

poenæ

§ 3 *KöpmBl. StL*. Vid. *ABRAHAMSON* ad IX. cap. *KöpmBl. LL*. ubi perfidos Depositarios trium marcarum mulcta plectendos docet. Rectius, quod tamen nemini in mentem venisse reprehendimus, de hujusmodi crimini poena, analogica Juris applicatione pronunciari debuisse ex c. IX. §. 4. *SkipmälBl. SjöL*.

prædicti gradus determinat, atque id quidem tanta cum distinctione & mensuræ adcuratione, quantam in peregrinis legibus, si forte unum exceperis Jus Romanum, frustra quæsiveris.

§. VIII.

At tempus jam est, ut ad singula quæ in depositis patrari solent delicta strictim consideranda properemus. Ex iis quæ proprietatem rei adtingunt, primo loco se nobis offert crimen, quod *inficiatio*ne ipsius depositi continetur. *Inficiari* autem non is tantum dicitur Depositarius, qui vel ab ipsomet Deponente, vel ab eo qui hujus fruitur jure, vel etiam ab alterutrius horum mandatario, de restituendo deposito appellatus, præfacte negat se rem in custodiam suscepisse; verum & is, qui adversus veritatis conscientiam prætendit rem aut jam restitutam aut absque ulla sua culpa fortuito quodam casu perditam. Duplex vero, respectu ad ipsam depositi speciem habito, hujus criminis constituti sunt gradus. Si enim *voluntarium* fuerit depositum, dimidia rerum depositarum æstimatione punitur rens doli convictus (*a*). Quod idem & in *sequestre*, si rem alienam apud de sequestratam abnegaverit, obtinere, præter omne est dubium (*b*).

D 2

Atque

(*a*) XII. 9. *HBI*.

(*b*) §. II. *ibd.*

Atque hæc quidem mulcta, quæ in Actionibus depositi, ordinaria velut habenda est, seu, quod perinde valet, toties irroganda, quoties adgravantia nulla factum circumstant momenta, quamvis ex opinione bonorum omnium non possit non existimationem depositarii minuere, nullam tamen quam vocant, *infamiam juris ei infert.* Et poterit fortassis, ex antecedentibus satis colligi, quibus ex caussis leni adeo remedio hujusmodi delinquentes coercendos voluerit Legumlator. Sin miserabile quis depositum inficias ivit, is ordinaria plectitur furti poena, tripla nimirum ipsius depositi (*a*), & præterea infamia, qualis fures sequitur, notatur, ad publicam criminis in Ecclesia depreciationm simul condemnandus (*b*). Cujus quidem gravioris hoc in casu prænæ ratio, non tam inde repetenda est, quod majori digni videantur odio, qui communium miseriarum oblii, afflictis afflictionem addunt, & suffocato velut omni humanitatis sensu, quæ fortunæ calamitas reliqua fecerat bona, nefanda lubidine adpropriare sibi student; quam inde potius, quod partim, cum fortuita sit hujus depositionis caussa ex necessitate descendens, nihil hic adsit, quod voluntati deponentis, qui electionis libertatem integrum non habuit, imputari jure queat; partim quod in tanta animi consternatione, & cum res moram non patiatur,

eve-

(*a*) §. 10. *ibid.*

(*b*) *K. BR. d. 16. Febr. 1738. cfr. RABENII Dissert. de infamia juris. Uff. 1755. §. 15.*

evenire facillime possit ut res non idoneo commendetur, majusque idecirco perfidiae immineat periculum. *Eas* namque sunt animadvertenda peccata maxime, quæ difficilli-
me præcaventur (a). Quia vero obligatio, quam ex deposito contrahit Depositarius, patrimonii sui visceri-
bus inhaeret, iisque innexa in heredem transit, oppi-
do liquet, etiam hunc si mala fide celare depositum
sustinuerit, eidem ac jam dictum est, pœnæ obnoxio-
um femet reddere. Ante tamen quam ex deposito
miserabili in furti pœnam condemnari possit heres,
necessæ est, ut plenissima probatione doceatur caussam
depositionis sibi fuisse cognitam. Alias ad ordinariam
folummodo abnegati depositi tenebitur mulctam.

§. IX.

Alterum, quod in *proprietate* rerum depositarum
admittitur crimen in fraudulosa consistit earum *contre-
stitione*, quando scilicet Depositarius lucrificiendi a-
nimò illas sibi adpropriat, in usus suos convertit, op-
pignorat, aut quoctunque titulo alienat. Ut vero quæ
huic perfidiae statuta sit pœna constare queat, non suf-
ficit ad solum istud, quod *voluntarium & miserabile* de-
positum intercedit discrimin adtendisse. Videndum
simul erit *quomodo & apud quem* facta sit depositio. Si
prius species, duos potissimum casus legibus notatos
invenies. Aut enim Depositario res traduntur *simpli-*
citer,

D 3

(a) CICERO pro Rosc. Amer. c. 40.

ceter, ut *eas*, proutcunque velit & opportunissimum sibi judicaverit, custodiat (a): aut etiam *sera* & *sigilla* *occlusa* adservandæ sibi commendantur (b). Simpliciter *sive* ex libera electione, *sive* ex necessitate depositas ubi interverti contigerit, non alia Depositarium manebit pœna, quam cui ex abnegato deposito, vel voluntario, vel miserabili, secundum ea, quæ superiori §. docuimus, obnoxium semet reddidisset. Hactenus enim *abnegare* & *intervertere* pari plane passu ambulant. Et quantumvis duos velut hujus criminis gradus concipere liceat, turpiorem unum cum *inficiatio-*
ne *conunctum*, alterum minus turpem, cum reum habes confitentem: quia tamen publicæ securitatis parum omnino interest, uter horum obtineat, cum in illo non minus ac in hoc casu rupta sit fides & læsus Deponens; Leges præterea aliter, aliter Philosophi tollere soleant astutas; nullum nostro Jure, sicut *Fu-*
finiane factum audivimus, ex hac quidem caussa, proditum est punitionis discriminem. Si autem, cistas, sarcinas, involuera vel quæcunque alia vasa a Depositante obserata & oblignata referare vel resignare præsumserit Depositarius: tum quia non fidem tantummodo fecellit, verum & qualemque domini ipsius custodiam temerario violavit ansu, ordinaria, si voluntarium fuerit depositum, furti pœna, scelus suum piabit (c).

An-

(a) XII. 1. 4. *HBl.*(b) §. 3. *ibd.*(c) §. 10. *ibd.*

31

Antinomiam vero aliquam inter hanc Legis sanctionem
& priorem illam de rerum custodiæ Depositarii simpliciter commendatarum interceptione mitius punienda comminisci velle, id quidem quomodo succedat perceptu admodum est difficile. Amicissimo hæc, quantum video & inter se & cum tota Juris compage nexu cohaerent. Diversa valde sunt ambo hæc crimina: & diversam proinde de iis esse oportet legis dispositiōnem. Personarum de quibus utroque agitur loco, altera rem contrectat, quam sub suis habet manibus, & quam ei implicita fiducia eredit dominus, nulla, ne minima quidem custodiæ parte sibi reservata. Altera contra seras frangit & sigilla, atque res surripit suæ quidem fidei commissas, at domini etiam ipsius custodiæ quodammodo inclusas. Si inter *furtum simplex*, & *effractione perpetratum*, tantum jure obtinet discrimen, ut illud tripla rei furtivæ æstimatione, hoc poena corporis afflictiva lui debeat (a): quidni & qua utramque hanc interversionis speciem similis quædam obtinebit ultionis disparitas. Obtinebit omnino, si & has furtis ipsis annumerare velis. Nisi enim obtineret, evidentissima, de qua ubi nulla adparet tollenda tu laboras, existeret legum collisio. Sed fortassis hac de re quantum satis. Dispiciendum autem adhuc superest, qua poena adsici conveniat Depositarium qui ex deposito miserabili res seris inclusas aut consignatas dolose abstulit. Anceps hæc est quæstio, nec in lege deci-

(a) Cfr. *XL. I. § 6. MGB.*

Decisa. Id clarum, capitalem, quæ surto in miserandis hujusmodi casibus patrato statuta est, pœnam (a), locum hic non habere. Manifestissimæ enim id legum analogiæ repugnaret. Attamen & justo leniorem fore ordinariam, quæ tale depositum simpliciter inficianti irroganda præcipitur, surti poenam, æque videtur indubium. Qua enim idonea suffultus ratione contendere posses, æqualem in hac causa esse debere utriusque delicti pœnam, quam in deposito voluntario inæqualem expresse sanxerunt leges. Quomodo ergo puniendus erit. Forte pœna capitali quadam proxima. Saltim ab atrocitate facinoris illa nouabluderet. Verum non est nostræ tenuitatis, in casu adeo ambiguo, nostrum interponere arbitrium.

§. X.

Sed diximus, in decernenda contrectati depositi pœna, rationem nonnunquam habendam esse etiam personæ apud quam facta fuit depositio. Valet hoc in primis qua Tabernarios publicos & caupones, item Magistros navium & aurigas eorumque famulitum, quippe quibus peculiaris statuta est quadrupli mulcta, si in rebus aut mercibus quibuscumque, quas ex speciali domini mandato custodiendas, vel ex locato ad certum quendam locum salvas transvehendas suscepserunt

perunt perfide fuerint versati (a). Si quid de rebus hospitis furentur, id est si de suæ custodiae speciatim non commendatis quidquam furripiant qui meritoriam exercent tabernam aut qui ad horum spectant ministeria, dupla furti mulcta, vel quod idem valet, sextupla rei furto ablatae eos plectendos esse notissimum est (b). Ad securitatem nempe viatorum bonis contra furtivas machinationes ab hac populi saece adsfatim pertimescendas præstandam, tam dura opus fuit poena. Quod vero hi iidem, & quos præterea non inavimus, ex amotis rebus suæ fidei concreditis quadruplicem tantum ferant mulctam, eamque integra adeo tertia parte isti ex furto, cuius modo mentionem fecimus, leviorem, id ea propter sic constitutum est, quod non tam credibile sit hos, cum custodiæ rerum promiserint eoque ipso ad certam damni, si quod datum fuerit, reparacionem semet obligarint, fidem violaturos, quam hoc qualiscunque paci vinculo non obstrictos, furtum, quippe multo cum probabiliori & impunitatis & lucri spe conjunctum, patraturos. Atque sic quidem & evidentissime patere arbitramur inter duo proxime allegata legum loca non modo nullam adesse pugnam, verum & utriusque sanctionem principiis supra traditionis exactissime esse conformatam (c). Interim fractam

E

in

(a) XLII. 3. MGB.

(b) XXVIII. 12. BygnB.

(c) Conciliandis duobus hisce locis operam ante hac dederunt Consultiss. Duumviri COLLING Dissert. Speciali

in rebus commendatis fidem, nullo in casu, graviori quam in hoc ipso mulcta, legibus nostris vindicari certum est. Cujus tamen rei rationes non e longinquarcessendas quisque videt. Ita scilicet comparatum est, ut qui merces transmittere necesse habent, naclerorum aut vecturis quibuscumque viventium, non quorum maluerint, sed quorum praesto esse contigerit, operam eligere cogantur: ut item viatores & peregrinantes non quae voluerint, sed quae publica auctoritate constituta fuerint diversoria sequi teneantur. Quo ergo magis restrictam dominorum electionem; quo difficiliorem ac incommodiorem rerum ipsis fabratarum persecutionem; & quo denique lubricam magis Depositariorum integritatem his in casibus futuram prævidit Legumlator: eo etiam severiori animadversione compescendam horum judicavit perfidiam. Et si vel cætera hæc momenta in deposito quoque miserabili concurrere dixeris, singularem tamen persecutionis difficultatem huic depositorum generi propriam velut esse, quinimo publicam quodammodo in his ipsis fidem laedi concedes. Unde nec mirum rupti hujus depositi triente majorem quam miserabilis statutam esse mulctam (a). Utrum vero simpliciter
an

Lundæ 1760. edita & SOLANDER in *Frödda och besv.*
Logfråg. p. 12. & *Continuat.* XV. p. 157. Non tamen dubitamus, & ex hac nostra lucis aliquid eidem argumento accessurum.

(a) Consentient fere cum nostris & aliarum gentium

an cistis & sarcinulis obseratis vel sigillo munitis inclusæ res hisce personis commendatæ sint perinde fuerit. Quod tamen naucleri & nautæ quadrupla hac mulcta adficiendi non veniant nisi ex surreptis bonis peculiari suæ custodiæ commissis, & ex quibus transvectis, ipsis solis, nisi navem in depositorum securitatem obligaverint, merces debetur, id quidem in propatulo esse existimamus. Ex fraude enim in onere navis ab Exercitoribus ejusdem suæ administrationi mandato, simplicistantum furti actione Nauclerum teneri in confessio eit (a). Cæterum ab hoc loco alienum non erit quærrere, quam ex contrectatis rebus depositis poenam incurrat, qui commissi publico nomine muneric fide ad custodiæ earum obligatur. Et putaverim quidem, falvis aliorum judiciis, dupla ejus, quæ pro cuiusque caussæ diversitate privatis Depositariis irroganda foret, mulcta, adjecta amotione ab officio, in eos animadvertisendum esse (b). De irregulari tamen quod vocant deposito sermonem jam non esse, mone-

E 2 re

hac in re instituta. Vide sis l. 1. seqq. ff. de Nautis, *Caupon & Stabul. JUS Lubec Lib. IV. T. I. Art. VII.* & *MEVII ad b. l. comment. KRESSIUM l. cit.*

(a) cfr. *Sjölag. c. XV. SkiplB. c. VII. RedB.* & c. III. *ibid.*

(b) Argumenta hanc nostram confirmantia sententiæ ex collatis *VIII. 3. XVIII. 9. MGB.* & *I. 8. UtsB.* cum iis quæ cap. *XII. HB.* statuta sunt, haud difficulter eruuntur.

re vix opus fuerit. *Sequestrem* demum quod adtinet; dubitari nequit, quin & is, si quæ vel ex partium mandato, vel Judicis aut Executoris decreto privata fide custodienda recepit, dolose contrectaverit bona, ad eam plane ex isto facto, ac alius quicunque privatus Depositarius condemnari debeat mulctam (*a*); nisi & simul sigillum Præfecti Regii, quo res sequestratæ forte obsignatæ fuerint, ruperit. Tum enim & hujus proterviae pro re nata luet mulctam (*b*).

§. XI.

De delictis circa *usum* rei depositæ pauca admodum sunt quæ commemorari merentur. Per se intelligitur de illegitimo rei usu quæstionem in foro moveri vix posse, nisi qua res *non fungibles* simpliciter depositas, & ne qua has quidem, quod & lex disertè innuit, quoties ostendit potest dominum in usum rei suæ expresse vel tacite consensisse, & rem, si vel depositarius citra domini consensum ea usus fuisset, deteriorem inde nulla ratione redditam. Hinc si Depositarius, festiva quadam occasione rebus apud se depositis e. g. argenteis candelabris, aut vasibus pretiosioribus, ad pompam tantummodo usus fuerit, vel alteri alicui in pari casu commodaverit; si libros depositos perlegerit, aut aliis legendos tradiderit, ut plura jam

(*a*) *XII. 11. HB.*

(*b*) *VIII. 8. UtsB.*

jam non cumulemus exempla, extra dolum & peñam id esse censebitur. Præsumendum enim est dominum ipsum, si adfuisse, in id consensurum, nec innoxium rei suæ usum, aut commodandi libertatem, sibi detrimento non futuram, amico, qui gratuitam suarum rerum suscepit custodiam, negaturum non fuisse. Consequitur ergo, ex usu rei depositæ non aliter se mulctæ obnoxium reddere Depositarium, quam si *invito* domino, vel ipse re sic usus sit, ut *deteriorem* inde eam evasisse doceri possit, vel eam aliis cum danno domini utendam concederit (a). *Furtum usus* hoc delictum nonnulli adpellant; quam tamen loquendi formulam, utut recte intellectam adhiberi nonnunquam posse largiamur (b); in hac tamen caussa, ut Juri nostro incongruam, reprobandam censemus.

§. XII.

Circa *custodiā* depositi duplicitē peccari supra diximus, *dolo* nimurum vel *culpā*. Dolo fidem in re custodienda eum fregisse diceas, qui non lucrificiendi intentione, tum enim *contrectationis* adesset crimen, sed solo lædendi animo, & data quidem opera, ipse vel per alium id effecit, ut res aut *periret* aut *deterior* e-

E 3

vade-

(a) *XII. 4. HB.*

(b) Adequate loquendo *furtum usus* non existit nisi cum quis rem alienam, e custodia domini, utendi ejus causa, clam auferat, cfr. *XLIII. 3. MGB.*

vaderet, ut qui e. c. sciens & volens res depositas in ignem, cremandas conjecit. Credibile quidem vix est tantam futuram Depositarii alicujus malitiam, quippe quæ a diabolica parum abesset, ut absque ullo suo emolumento, res alienas, quas salvas fore promiserat, perdere aut corrumpere in animum induceret. Si tamen alicubi positi ultra fidem facinoris exemplum occurreret, non aliam ejus regulariter dictari posse putaverim pœnam, quam qua, pro ratione circumstantiarum, contrectatio aut illegitimus depositi usus, essent vindicanda. Extra adlatum hunc casum, quoties scilicet deliberatum nocendi consilium Depositario imputari nequit, & res tamen vel perditæ sint vel deterioratæ; hic autem nullum quo id accidisset probare valet infortunium, humana, qualis esse solet, industria minime præcavendum; culpa deliquisse censetur: atque hanc quidem, ubi major fuerit, quam ut Depositarium in propriis suis rebus eandem admissorum fuisse probabile sit, ut naturalis ratio, sic & lex nostra, præstandam jubet, nulla cæterum negligentiae pœna statuta (a). Quæ vulgo traditur *culpæ* in *latam, levem & levissimam* distinctio, in se licet considerata idoneo non destituatur fundamento, ideoque & tantum absit, ut e Jurisprudentia nostra, quæ quorundam est opinio (b), eliminari penitus debeat, ut potius in criminali præcipue Jure, ubi de æstimandis homici-

(a) XII 2. HB.

(b) EHRENSTRÄLE Jurispr. civ. p. 153. §. 9. & Ju-

micidii culposi gradibus quæritur, retinenda omnino videatur: Attamen, quæ a veteribus Romanorum Jure Consultis & interpretibus eorum glebæ adscriptis de finibus inter singulas has species regundis subtiliter admodum disputata sunt, nullius fere in praxi forensi esse usus, saltim si ad culpæ in contractibus præstationem adplicantur, THOMASIO, quem tamen & hac in re justo longius progressum suoque in Jus Romanum velut odio nimis indulisse facile adparet, jam dudum est observatum (a). Horum itaque de dimetienda culpa regulas, ut vagas, incertas, & totidem fere, quot sunt easus illis comprehensi, exceptionibus obnoxias, tanquam speciosas nugas adsperratum est Jus nostrum, constituta unica tantum regula: *Res alienas, quarum custodice quis fidem suam gratis addixit pari qua proprias diligentia custodiendas esse* (b): quam & accedente prudentis Judicis arbitrio, ad justam omnium, quæ in hoc argumento ventilari solent quæstionum decisionem sufficere arbitramur. Fluit videlicet hinc per pronam, quod ajunt, consequentiam, diligentiae in Depositario gradum, non ad maximum qui singi potest, nec ad communem quendam prudentiae humanæ modum,

nun-

rispr. crim. cfr. *Jurispr. Crim.* p. 253. §. 20. ubi tamen sententiam suam mitigasse paullulum videtur.

(a) *Dissert. de Usu præst. Juris Rom. de culparum præstatione in Contract. quæ habetur in Collect. supr. cit. T. II. p. 1006. seqq.*

(b) *XII. 2. HB. in pr.*

nunquam exacte satis determinandum, sed in speciali quovis casu, ad eum quem in suis adhibere consuevit, esse exigendum: sibi igitur imputare debere deponentem si depositarium elegerit paullo stolidorem & suarummet rerum incuriosum: in casu communis periculi Depositarium, si res depositae cum suis æqualis fuerint pretii, suas recte præferre: contra si depositas suis pretiosiores esse contigerit, ad has potius conservandas esse obligatum, ita tamen ut Deponens eum indemnem pro rata præstare teneatur: ut plura jam ejus consectaria sicco prætereamus pede. Quod tamen is qui mercedem pro custodia sibi stipulatus est, ad exactissimam teneatur diligentiam omni vacat dubio. Notari porro meretur Antiqua Germanorum & nostratium jura in Depositarios paullo suis iniquiora. Volebant quippe partim ut is solus casum ferret ex furto & rapina; partim ut quemcunque prætexeret casum, si docere non posset suas etiam res eidem periculo involutas periisse, culpæ haberetur convictus; quod fere etiamnum Jure Danico (a) & Lubecensi (b) observatur; partim denique ut, in communi calamitate damnum pro rata cum deponente partiretur (c). Hodiernæ contra nostræ leges Depositariis magis faciunt. Pro his namque præsumptionem semper faciendam jubent. Hinc cum Deponens in culpa suis con-

ten-

(a) *Lib. V. c. 8. §. 14.*

(b) *Lib. III. Tit. 3. art. 1. & ibi MEVIUS.*

(c) Videantur loca Antiquarum legum German. ad

Tendit Depositarium, plenissima id docebit probatione. Alias Depositarius, etiam præsumptionibus gravatus, ad purgandam juramento culpam admittitur (a): Qui nimo, quoties his in caussis juramento suppletorio locus fuerit, illud non Deponenti, sed Depositario est deferendum. Ratio autem hujus rei, ut breves simus, in eo sita est, quod æquum omnino videatur, ut non dissident ejus assertioni leges, cui dominus ipse de rei jam controversæ custodia fidem habuit (b).

§. XIII.

Peccat & tandem in deposito is, qui in *mora* est restituendi, id est, qui ab eo cui jus reposcendi seu tollendi depositi competit legitime interpellatus, restitutio nem injuste & frustratorie differt. Patet autem hinc, antequam in *mora* esse dici possit Depositarius, neces-

F

se

calcem p. 13. not. (b) p. 24. nott. (g), (b) & p. 25. nott. (a) & (b) adducta: quibus addere lubet Legg. Longob. LUITPR. L. XI. l. 78. & Legg. Wisigoth. Lib. V. Tit. 5, apud GEORGISCH l. c. pp. 1098. & 1999. seqq.

(a) XII. 3. HB.

(b) Eadem ex Jure *Anglico* quæ ex nostro Depositariorum est conditio. Hinc & de privilegio horum, quo ad culpæ suspicionem juramento amoliendam admittuntur, hunc in modum ratiocinatur BLACKSTONE l. c. L. III. c. 9. p. 152. This privilege is grounded on the confidence originally reposed in the bailee by the bailor, in the borrower by the Lender, and the like; from whence arose a strong presumptive evidence, that in the plaintiff's own opinion the defendant was worthy of credit.

se esse, ut non solum a persona legitima, verum & ex legitima caussa interpelletur, & ut denique justæ nullæ adsint detentionis rationes. Legitima persona, cui legitime interpellant*i* restitutio debetur, regulariter ipse est Deponens, vel ejus heres, neuter tamen, nisi quatenus illo tempore & sui juris sit & rerum depositarum adhuc dominium habuerit. Hinc si Deponentis bona criminali sententia confiscata fuerint (*a*); vel ipse bonis cesserit (*b*); vel depositum alii, suo ipsius nomine, repetendum adsignaverit; vel administrationem suarum facultatum aut nondum adeptus, aut eadem exutus fuerit (*c*); recte ei denegari restitutionem, in postremo tamen casu Tutori faciendam, unusquisque intelligit. Pari modo frustra moræ accusabitur Depositarius, si depositum ei qui mandatarium se domini venditat, sed mandatum exhibere nequit (*d*); vel uni Deponentium rem a pluribus indivisim depositam (*e*); vel alterutri litigantium, non monstrata Judicis aut Executoris de tollendo sententia, rem apud se sequestratam (*f*) reddere detrectaverit. His enim singulis nulla haec tenus jure competit reposcendi depositi facultas. Sed & qui dominus est ex *justa* interpellabit *caussa*. Id vero fecisse censetur, quoties manifeste non adparet,

eo

(*a*) *IV.* 1. 8. *VI.* 1. *XXI.* 3. 5. *XXII.* 3. 4. *MGB.*

(*b*) *XVI.* 6. *HB.* *in fin.*

(*c*) *XIX.* 1. 2. 4. *AB.* *K. Kung.* *d.* 11. *Maji* 1774.

(*d*) *XVIII.* 1. *HB.*

(*e*) *XII.* 5. *HB.*

(*f*) *XII.* 11. *HB.* *VIII.* 7. *UtsB.*

eo a se animo depositam rem repeti, ut illa in certissimam suam aut aliorum perniciem in continentia utatur. An enim quis furibundo propriauit suam necem aut inimici cædem adtentaturo gladium in sua custodia depositum reddendum putaret. Verum purgant & præterea moram, aliæ si quæ adfuerint idoneæ *negandæ redditionis cauſæ*. Tales autem duas tantum legibus proditas invenio: unam si interdictum Executoris de non reddendo intervenerit (*a*): alteram si depositum repetiturus, sumtus in ejus custodiam necessario factas resarcire noluerit; tum enim Depositario *jus detentionis* quoad sibi satisfactum fuerit leges tribuunt (*b*). Ubi vero hujuscemodi cauſæ petitioni Deponentis opponi non possunt; nec justa ulla vel contra interpellantem vel interpellandi cauſam obtinet exceptio, Depositarius ex pacto & lege ad rem & quidem in specie protinus restituendam obligatur, nisi ex mora, ad expensas, quin &, si pecunia sit deposita ad usuras condemnari velit. Est scilicet, ex natura contractuum bonæ fidei, depositum eo usque privilegiatum, ut Depositario nec sub ratione pignoris, nec in compensationem sui crediti, privato ausu detinere illud liceat (*c*): ut item nulla, ne quidem longissimi temporis præscriptione ejus restituendi necessitas extinguitur.

(*a*) Vid. loca prox. citata & VIII. 2. mom. 3. RB.

(*b*) XII. 8. HB.

(*c*) Valet hic idem quod in casu de quo XI. 3. HB.

Persecuti jam sumus potissima quæ in *depositis* proprie sic dictis admitti possunt delicta. Quæ autem in illis quæ primam quasi eorum classem constituebant vindicaudis adoptata Jure nostro principia ostendimus, eorum usum nemo angustis hujus materiæ limitibus conclusum temere crediderit. Iisdem enim innixus de omni perfidia disposuit Legumlator, quam quis in re aliena, suæ quoquo modo fidei credita admisit, si paucissimas modo extraordinarias exceperis caussas, ex publicæ utilitatis ratione extraordinaria severitate coercendas. Facit quidem infinita caussarum diversitas ut nec sit, nec esse possit eadem ubique hujus perfidiæ poena. Eo tamen ipso generalium istorum principiorum veritatem non infringi nemo fere est qui non intelligit. Interea quisquis hanc satis perspexerit, & quid quæque factorum species singulare habeat simul intellexerit, nullo negotio rationem reddet sequentium problematum: cur perfidiæ in re *commodata* & *deposita* eadem sit poena (*a*)? cur abnegatio mutui, & *inficiatio* seu *depositi* seu *commodati* paria omnino erimina esse aestimentur (*b*)? cur dolus in *pignore*, mitius quam

is

(*a*) *XI.* 2. 4. *XII.* 4. *HB.*

(*b*) Non me fugit eum fere esse fori usum ut qui mutuum & datum super eo chirographum inficiatus fuerit, non alia quam quæ coram Judicio mentientibus *XIV.* 8. *RB.* proposita est, adfiei soleat mulcta. At ut non jam dicam universo velut spiritui Juris nostri repugnare, ut

is in deposito, commodato & mutuo puniatur (*a*); cur opifex, rem sibi in opificium datam distrahens solis vingtia thaleris mulctetur (*b*)? Cur Tutor ex bonis pupillaribus distractis (*c*); & Institor ex fraude in rebus mandantis (*d*) furti non teneantur? Et cur denique nec ex crimine residui (*e*), nec ex contredictione rei sociæ (*f*) furti detur actio. Inveniet idem, sublatis istis, principiis, si tolli modo juste queant, necessarium fore, nisi dissolutas scopas totum Juris nostri corpus referat, ut hæc omnia immutentur.

§. XV.

In iis, ut & id coronidis loco addamus, quibus hæc displicuit Juris nostri philosophia, nomen in primis professus est *Vir Generosissimus, Justitiae Cancellarius & Eques Regii Ordinis*

F 3

tam turpe factum exigua adeo piaretur mulcta; Legum etiam analogiæ aperte contrariari ut pro Judiciorum dignitate cresceret hujus criminis poena; colligi manifeste admodum posse arbitror ex *IX. II. HB.* dimidia abnegati debiti estimatione fraudem inficiantis esse puniendam. An enim ullum concipi potest discrimen inter creditorem mala fide quod solutum est judicialiter denuo poscentem, & Debitorem, quod debere se scivit, abnegrantem. Sed si quis extensivæ huic Juris in causa criminali interpretationi adquietendum non putaret, fortassis is expresso inhærere malit textui *IX. 4. SkipmB. SjöL* in quo simpli poena Debitoribus suum chirographum inficiantibus statuitur: quam tamen equidem ultra causas materialias in forum commune trahendam non vellem.

(*a*) *X. 3. 7. HB.* (*b*) *XII. 12. HB.* (*c*) *XXII. 1. XXIII. 5. AB.* (*d*) *XVIII. 3. HB.* (*e*) *XLV. 2. MGB.*
(*f*) *XV. 4. HB. LI. 1. MGB.*

dinis de Stella Polari Dn. JOACH. WILH. LILJESTRÅLE
 ostendere scilicet annis, non omnem modo fraudulentam
 ferum oppignoratarum, commodato acceptarum & deposi-
 tarum contrectationem & furtum esse & ordinaria furti poe-
 na coerceri debuisse, verum & Legum nostrarum in hac ma-
 teria sanctiones sibimet invicem contrariari. Sed ipsis Suis
 verbis *Generosissimum Virum loquentem faciamus.* Ita autem
 ille: *Enkel tjufnad, som består deruti att någor listeligen, emot*
egarens vetskäp och vilja, tilågnar sig gods hans, straffar Lagen
i MB med tredubbla böter. Denna principe är rätteligen följd i 12
 Cap. 3. §. HB. at den som vägrar utgifva depositum, ocb bevises
 hafva det försnillat, skal stå tjufs-rått: men i 9. §. samma Cap.
 står: nekar man, emot bättre vetande, til inlags-få och för-
 erördt gods, plikte halfva värdet; där likväl uppenbart är, i min-
 tanka, at den som vetterligen nekar til depositum, kan aldrig gö-
 ra det i annat uppfåt, än at egaren dess gods försnilla: Bågge åro
 ålsfå lika goda tjufstycken, och i grunden ingen skilnad mellan
 dessa casus: hvilket jag och håller före vara det samma, då någon
 nekar til mottagen Pant, eller lån: då någon svikeligen köper
 eller til gäfva tager det som bonom vitterligen är annars gods,
 eller ock falskeligen tager lån i annars namn, som alt efter 10.
 och 11. Cap. HB. allenast straffas med bot af halfva värdet; men
 rätteligen för tjufnader hörta ansees. Ånnu besynnerligare är, at
 16. Cap. 6. §. stadgar, at den som vitterligen döljer en förrymd
 Debtors penningar eller gods, som han hafver bos sig inne, och
 det ej til creditorerne efter pålysing upgifver, skal bota dubbla
 värdet; men bvarföre icke för sådan tjufnad tredubbla böter ef-
 ter 12. Cap. 3. §. HB.? Sådana lagar åro ej Systematiske, ej el-
 ler främja sederna med det alfvär, som vederbör (a). An vero
 idonea ulla his constet ratio, & annon quæ superius a nobis
 qualitercunque disputata sunt, valida satis ad horum confuta-
 tionem, & Legumlatoris nostri sive sapientiam, sive in singu-
 lis suis præceptis sumimam secum confessionem, in tuto col-
 locandam, suppeditent argumenta, æquo Lectori judicandum
 felinquimus.

(a) *TAL om Lag-förbättring, hållit för K. Vetensk. Acad. i Stock-
 holm d. 4. Novembr. 1775. p. 36. 37. in not.*

